



25. GODINA IMAMSKE DUŽNOSTI U DUBROVNIKU

U Dubrovniku je u povodu 12. Rebiul-evvela, rođenja Muhammeda alejhis-selam u petak 12. rebiul-evvela 14331. h. g./26.02.2010. g. na mevludskoj svečanosti, održana rijetka, ali značajna i važna svečanost. Glavni imam Dubrovački Salkan ef. Herić obilježio je 25 godina neprekidnog imamskog rada u ovom medžlisu. Bila je to prilika da Salkanu ef. najsrdačnije čestitamo na tom velikom jubileju i odamo mu dužnu zahvalnost za sve što je činio i čini, zajedno s odgovornima u medžlisu, na unapređenju i izgradnji Islamske zajednice u najjužnijem dijelu zemlje.

Pored velikog broja džematlija, članova izvršnog odbora medžlisa, članova Sabora Islamske zajednice u Hrvatskoj i Bosni i Hercegovini sa dubrovačkog područja, svečanosti su nazočili i jedan od najstarijih imama u Hrvatskoj glavni imam iz Gunje Idriz ef. Bešić, Husejn ef. Hodžić glavni Trebinjski imam, Adem ef. Emrović imam i Tivta i Boke Kotorske, te Sadet ef. Bilalić imam iz Gacka. Uz spomenute imame svečanosti je nazočio i prvi muallim Salkana ef. Iz Živinica Rasim ef. Hamidović, sada izdavač islamske literature u Tuzli.

Pored spomenutih imama svečanosti je prisustvovao i predsjednik Mešihata Islamske zajednice u Hrvatskoj muftija Ševko ef. Omerbašić. Nakon proučenog mevluda i ilahija koje su pripremili najmlađi polaznici vjeronauka, prvi se obratio predsjednik izvršnog odbora medžlisa i član Mešihata gospodin Fehim Vukotić istakavši velike zasluge Salkana ef. U očuvanju i razvoju Islamske zajednice. U ime odbora poklonio mu je vrijednu umjetničku sliku koja će ga podsjećati na dane, mjeseci i godine provedene s muslimanima Dubrovnika. Nakon njega obratio se Idris ef. Bešić, glavni imam iz Gunje koji je čestitao Salkanu ef. na strpljenju i imamskoj istrajnosti što spada u rijetkost naše službe. U ime svoga medžlisa uručio mu je poklon. Potom se prisutnima obratio i Husejn ef. Hodžić, imam Trebinjski koji s velikim uspjehom, hrabrošću i upornošću obnaša dužnost imama u krajnje nepovoljnim uvjetima. Zahvalio je Salkanu ef. i dubrovačkim muslimanima što pružaju njemu i trebinjskim muslimanima nesebičnu podršku u njihovoj opstojnosti. Zatim se prisutnima obratio Sadet ef. Bilalić čestitajući Salkanu ef. veliki jubilej, zahvalivši mu i dubrovačkim muslimanima za sve što čine da se Islamska zajednica u Gacku održi i razvije. I zaista dubrovački medžlis i muslimani čine goleme napore da se tamošnji muslimani održe i očuvaju svoju djedovinu.

Zadnji se obratio prisutnima i slavljenu predsjednik Mešihata muftija Ševko ef. Omerbašić koji je posebno doputovao na ovu svečanost kako bi odao dužnu zahvalnost i priznanje Salkanu ef. na predanom radu i naporima za našu uzvišenu vjeru i Islamsku zajednicu. Muftija je istakao da Salkan ef. kao rijetko koji imam imao je beskrajnu strpljivost i odlučnost da uspije u svom radu. Zahvaljujući blagoj naravi i ljubavi prema imamskoj dužnosti uspio je. U znak priznanja i zahvalnosti za sve što je učinio predao mu je vrijedni novčani dar Mešihata.

Posebno je bilo dirljivo kada su mu se obratili njegovi prvi vjeroučenici, a koji su sada oženjeni i udane i koji su vrijedni članovi Islamske zajednice. Salkan ef. je svojim nesebičnim radom dočekaao da rezultate svoga truda vidi u desetinama muslimanki i muslimana, članova zajednice, koje je on obučavao i uvodio u našu uzvišenu vjeru.

U svom obraćanju prisutnima Salkan ef. se prisjetio svojih prvih dana imamskog rada i usporedio ih sa današnjim stanjem konstatirajući da je stanje puno bolje, ali da se daje još učiniti. Treba istaći da Salkan ef. od početka svoga imamskog službovanja pa do danas neprekidno obilazi svoj džemat po nekoliko puta godišnje. Po tomu je jedinstven u Hrvatskoj. Ustvrdio je da muslimanska djeca u Dubrovniku u 99% slučajeva pohađaju školski i mektebski vjeronauk. Na tom podatku svi mu trebamo odati dužno priznanje. Velika je šteta što cijeli ili veći dio imamskog zbora u Hrvatskoj nije došao na ovu svečanost i veliki ne samo Salkan ef. jubilej. Zato koristimo priliku da mu još jednom najsrdačnije čestitamo ovaj veliki jubilej.